

**03 IUNIE**  
**RUGACIUNEA**  
**SF. CUVIOS**  
**DIMITRIE DE LA PRILUTK**

**Молитва**

О священная главо, предивный чудотворче, преподобне и богоносне отче наш Димитрие! Усердно припадающе к тебе, молимся; яви нам, смиренным и грешным многомогущее твое заступление. Се бо грех ради наших не имамы дерзновения ко Господу просити Его даров, нам благопотребных, но тебе, молитвенника к нему благоприятнаго, предлагаем и просим; испроси нам у благости Его вся, яже на пользу душам и телесем нашим; веру праву, надежду несомненну, любовь нелицемерну, во искушениях мужество, в злостраданиих терпение, в молитвах постоянство, в благочестии преуспеяние, вожделенное здравие, земли плодоносие, воздуха благорастворение, дожди благовременны, житейских потреб довольство, мир во днех наших и благословение свыше на вся благая дела и начинания наша, и да не во зло обратим дары Его, но в славу имени

Его святого и в прославление твоего о нас ходатайства. Испроси, угодниче Христов, у Царя царствующих и Господа господствующих богохранимей стране нашей Российской тишину и благостроение, на враги же победу и одоление. Не забуди, чудотворче святой, милостивно присещати град твой и обитель твою, и вся грады и веси страны нашея православныя, сохраняя и соблюдая их молитвами твоими от всякаго зла. Помяни всех, веру и любовь к тебе имущих, имя твое молитвенно призывающих, и на поклонение мощам твоим святым приходящих, и вся во благих прошения их милостиво исполни, осеняя их свыше святоотеческим твоим благословением. Ей, святче Божий! Не лиши и нас грешных твоего многомогущаго заступления, но сподоби нас кончину жития благую улучшить и Царствие небесное унаследити; да воспоем и прославим дивнаго во святых Своих Бога нашего, Отца, и Сына, и Святаго Духа, во веки веков. Аминь.